

Na osnovu člana 16. stav 2. Zakona o Vladi Zeničko-dobojskog kantona – Prečišćeni tekst (“Službene novine Zeničko-dobojskog kantona”, broj: 7/10), i člana 11. stav 2. Zakona o koncesijama Zeničko-dobojskog kantona-Prečišćeni tekst (“Službene novine Zeničko-dobojskog kantona”, broj: 5/03), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 99. sjednici održanoj dana 16.06.2017. godine, d o n o s i

## **ODLUKU**

**o dodjeli koncesije za izgradnju i korištenje male hidroelektrane: MHE: „KULA“ snage 3.370 kW, na rijeci Stavnji, općina Vareš**

### **Član 1. (Predmet)**

Investitoru „EKVA“ d.o.o. Vareš (u daljem tekstu: Koncesionar) dodjeljuje se koncesija za izgradnju i korištenje male hidroelektrane: MHE: „KULA“ snage 3.370 kW, na rijeci Stavnji, na parcelama označenim kao k.č. 1968 u K.O. Striježevo i k.č. 794/1 u K.O. Dabravine općina Vareš.

### **Član 2. (Način dodjele)**

(1) Koncesija se dodjeljuje za izgradnju MHE prema D.B.O.T. modelu (Projektuj, Izgradi, Upravlja, Prenesi), a uključuje izradu projektne dokumentacije, finansiranje svih nabavki i nadoknada koje se tiču izgradnje MHE, prikupljanje i realizaciju obaveza prema izdatim dozvolama i sporazumima, izgradnju MHE sa odgovarajućim objektima, probni rad i komercijalni rad tokom perioda koncesije i i prenos objekata nakon isteka perioda koncesije.

(2) Početak komercijalnog pogona treba biti najkasnije u roku od 3 mjeseca od izdavanja odobrenja za upotrebu objekta.

### **Član 3. (Vrijeme trajanja koncesije)**

Koncesija za izgradnju MHE po ovoj Odluci dodjeljuje se na vrijeme od 30 (slovima: trideset) godina, računajući početak koncesije od dana početka korištenja koncesije, odnosno početka proizvodnje električne energije, ali ne duže od roka iz člana 2. stav 2. ove Odluke.

### **Član 4. (Plaćanje tekuće koncesione naknade)**

(1) Koncesionar je dužan da plaća naknadu za korištenje koncesije po ovoj Odluci u visini, na način i po postupku i rokovima koji će se utvrditi Ugovorom o koncesiji.

(2) Za vrijeme trajanja koncesije korisnik koncesije je obavezan da plaća tekuću koncesionu naknadu u visini od 5 % od ukupnog prihoda od proizvedene električne energije.

**Član 5.**  
**(Plaćanje jednokratne koncesione naknade)**

Koncesionar je dužan uplatiti jednokratnu koncesionu naknadu u iznosu od 107.000,00 KM (slovima: stotinusedamhiljada konvertibilnih maraka), prije potpisivanja ugovora o koncesiji.

**Član 6.**  
**(Raspodjela koncesione naknade)**

Naknade iz članova 4. i 5. ove Odluke predstavljaju prihod Zeničko-dobojskog kantona i općine Vareš u omjeru koji je određen Odlukom Vlade Zeničko-dobojskog kantona o načinu raspodjele i korištenju finansijskih sredstava prikupljenih po osnovu kontinuirane i jednokratne naknade od koncesija ("Službene novine Zeničko-dobojskog kantona", broj: 1/13).

**Član 7.**  
**(Posebna vodna naknada)**

Plaćanje naknade za korištenje koncesije za MHE ne isključuje obavezu Koncesionara da plaća posebnu vodnu naknadu za korištenje voda u skladu sa Zakonom o vodama, odnosno u skladu sa vodnom dozvolom.

**Član 8.**  
**(Zaključivanje ugovora o koncesiji)**

(1) Zadužuje se Ministarstvo za poljoprivredu, šumarstvo i vodoprivredu da u svojstvu Koncesora, na osnovu ove Odluke i odredaba Zakona o koncesijama, zaključi Ugovor o koncesiji sa Koncesionarom, kojim će se urediti međusobni odnosi, prava, obaveze i odgovornosti, uz prethodno pribavljeno mišljenje Kantonalnog pravobranilaštva.

(2) Ugovor o koncesiji iz prethodnog člana mora sadržavati obavezu Koncesionara da prilikom izgradnje objekta angažuje 100% učešće domaćih privrednih društava.

(3) Koncesionar je dužan prije potpisivanja Ugovora o koncesiji, a najkasnije u roku od tri godine od donošenja ove Odluke, obezbijediti odobrenje za građenje objekata u funkciji korištenja predmeta koncesije.

**Član 9.**  
**(Stupanje na snagu odluke o dodjeli koncesije)**

Ova odluka stupa na snagu danom donošenja i objavit će se u „Službenim novinama Zeničko-dobojskog kantona“.

Broj: 02-\_\_\_\_\_/17.  
Datum, 16.06.2017. godine  
Zenica

**PREMIJER**

*Miralem Galijašević*

DOSTAVLJENO:

1 x Ministarstvo za poljoprivredu, šumarstvo i vodoprivredu,  
1 x Ministarstvo finansija,  
1 x „EKVA“ d.o.o. Vareš, putem Ministarstva za poljoprivredu, šumarstvo i vodoprivredu,  
1 x Općina Vareš, putem ministarstva,  
1 x „Službene novine Zeničko-dobojskog kantona“,  
1 x a/a.